

Broj:01-07-1237-02/08
Mostar, 19.11.2008. godine

Na osnovu člana 43. Zakona o električnoj energiji („Službene novine Federacije BiH“ broj 41/02, 24/05, 38/05) i člana 31. stav (2) i člana 37. stav (3) Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 59/04), a po prijedlogu Javnog preduzeća Elektroprivreda Bosne i Hercegovine d.d. – Sarajevo, Regulatorna komisija za električnu energiju u Federaciji Bosne i Hercegovine – FERK je, na XVI redovnoj sjednici održanoj u Mostaru dana 19.11.2008. godine, donijela

O D L U K U

o usvajanju Mrežnih pravila distribucije

Član 1.

Usvajaju se Mrežna pravila distribucije Javnog preduzeća Elektroprivreda Bosne i Hercegovine d.d. – Sarajevo predložena od strane ovog javnog preduzeća, u tekstu koji je dostavljen FERK-u dana 14.10.2008. godine pod brojem 06-03-1107/08, sa izmjenama i dopunama kako je to navedeno u prilogu, koji čini sastavni dio ove odluke.

Član 2.

Mrežna pravila distribucije iz člana 1. ove odluke objavit će se u „Službenim novinama Federacije BiH“ i na web stranici FERK-a, te će se dostaviti Javnom preduzeću Elektroprivreda Bosne i Hercegovine d.d. – Sarajevo.

Član 3.

Ova odluka stupa na snagu danom donošenja, te se objavljuje na web stranici i oglasnoj tabli FERK-a, kao i u „Službenim novinama Federacije BiH“.

O b r a z l o ž e n j e

Članom 43. Zakona propisano je da se pogon i način vođenja distributivne mreže u elektroenergetskom sistemu uređuje Mrežnim pravilima, kojima se posebno propisuju tehnički i drugi uslovi za priključak korisnika na mrežu, tehnički i drugi uslovi za siguran pogon elektroenergetskog sistema radi pouzdanog snabdijevanja kvalitetnom električnom energijom, zatim postupci pri pogonu elektroenergetskog sistema u kriznim stanjima, te tehnički i drugi uslovi za međusobno povezivanje i djelovanje mreža. Propisano je i da Mrežna pravila predlaže operator distribucije u saradnji sa Nezavisnim operaterom sistema i distributerima, a donosi FERK, te da se Mrežna pravila objavljuju u "Službenim novinama Federacije BiH".

Na osnovu navedenih zakonskih odredbi, FERK je u Početnoj dozvoli za rad – licenci za obavljanje elektroprivredne djelatnosti distribucija električne energije broj 06-03-

573/09/05 koja je 01.12.2005. godine izdata JP Elektroprivreda BiH d.d.-Sarajevo, u tački 4.10. odredio obavezu izrade prijedloga Mrežnih pravila distribucije.

U cilju osiguranja transparentnosti i javnosti postupka izrade i donošenja Mrežnih pravila, a slijedeći osnovna načela rada, kao i pravila i propise FERK-a, donesenim radi provođenja Zakona o električnoj energiji, FERK je 08.09.2006. godine donio Odluku o postupku donošenja Mrežnih pravila br. 05-07-707-07/06 („Službene novine Federacije BiH“ broj 55/06).

U skladu sa navedenom Odlukom, JP Elektroprivreda BiH d.d.- Sarajevo je dostavilo FERK-u Prijedlog Mrežnih pravila distribucije pod brojem 06-03-1070/06 dana 04.12.2006. godine. Uz navedeni prijedlog dostavljeno je „Obrazloženje prijedloga Mrežnih pravila distribucije Javnog preduzeća Elektroprivreda Bosne i Hercegovine d.d.- Sarajevo“, kao i „Izveštaj sa opće rasprave o Nacrtu Mrežnih pravila distribucije JP Elektroprivreda Bosne i Hercegovine d.d. – Sarajevo“, iz kojeg je vidljivo da je generalni direktor Javnog preduzeća Elektroprivreda Bosne i Hercegovine d.d. – Sarajevo 29.09.2006. godine donio Odluku o održavanju opće rasprave o Nacrtu Mrežnih pravila distribucije br.01-13488/06. Sastavni dio te Odluke je Obavještenje o javnoj raspravi o Nacrtu Mrežnih pravila distribucije, a koje obavještenje je objavljeno u „Dnevnom avazu“ 03.10.2006. godine, te zajedno s Nacrtom Mrežnih pravila i na web stranici ovog javnog preduzeća. Opća rasprava o Nacrtu Mrežnih pravila distribucije JP Elektroprivreda Bosne i Hercegovine d.d. – Sarajevo održana je u Sarajevu u prostorijama ovog javnog preduzeća 20.10.2006. godine sa početkom u 11:00 sati, na kojoj je prisustvovalo 50 zainteresovanih lica. Javno preduzeće je održalo i internu raspravu 01.11.2006. godine sa početkom u 12:00 sati, na kojoj su učestvovali predstavnici ovog javnog preduzeća, Nezavisnog operatera sistema u BiH (NOS-a) i „Elektroprenosa BiH“ a.d. Banja Luka, a po pitanju koje je tokom opće rasprave izdvojeno kao vrlo značajno pitanje – pitanje upravljanja prekidačima na sekundarnoj i tercijalnoj strani transformatora 110/X kV. Rok za podnošenje pisanih komentara zainteresovanih lica na Nacrt Mrežnih pravila distribucije je bio do 06.11.2006. godine do 12:00 sati. Uz prijedlog Mrežnih pravila distribucije dostavljen je i „Izveštaj o primljenim i usvojenim komentarima zainteresovanih lica na Nacrt Mrežnih pravila distribucije“, u okviru kojeg je javno preduzeće dalo obrazloženje za svoju ocjenu opravdanosti pojedinih usmenih i pisanih komentara datih na Nacrt Mrežnih pravila distribucije.

Obzirom da je FERK dana 23.05.2008. godine donio Opće uslove za isporuku električne energije („Službene novine Federacije BiH“ broj 35/08), FERK je pored pažljive analize dostavljenog prijedloga Mrežnih pravila distribucije, izvještaja o podnesenim komentarima u kojima je obrazloženo koji komentari se smatraju opravdani i osnovani, kao i razloga za neprihvatanje određenih komentara i komentare zainteresovanih lica koji su dostavljeni u FERK, odredbe istih analizirao i u odnosu na donesene Opće uslove za isporuku električne energije. Obzirom na navedeno FERK je 10.07.2008. godine, donio Zaključak broj 04-07-791-01/08 kojim je naloženo JP Elektroprivreda BiH d.d.- Sarajevo da u FERK do 15.09. 2008. godine dostavi dopunjeni i izmjenjeni prijedlog Mrežnih pravila distributivnog sistema, koji u skladu sa članom 43. Zakona o električnoj energiji treba biti usaglašen sa Nezavisnim operaterom sistema Bosne i Hercegovine, a sve da bi FERK mogao postupiti u skladu sa Zakonom datim ovlaštenjem.

Postupajući po Zaključku FERK-a, JP Elektroprivreda BiH d.d.- Sarajevo je dana 14.10.2008. godine pod brojem 06-03-1107/08 dostavila dopunjeni i izmjenjeni prijedlog Mrežnih pravila distribucije. Obzirom da je JP Elektroprivreda BiH d.d.- Sarajevo provela postupak donošenja Mrežnih pravila distribucije u skladu sa Odlukom FERK-a broj 05-07-707-07/06 od 08.09.2006. godine, te da su ista dopunjena i izmjenjena u odnosu na donesene Opće uslove za isporuku električne energije, FERK je putem svoje web stranice obavijestio javnost o dostavljenom prijedlogu Mrežnih pravila distribucije 15.10.2008. godine i istovremeno omogućio javnosti preuzimanje sadržaja istih. Istog dana FERK je navedeni prijedlog dostavio i Elektroprenosu Bosne i Hercegovine a.d. Banja Luka i Nezavisnom operateru sistema u Bosni i Hercegovini, te ih pozvao da dostave svoje pisane komentare u FERK do 22.10.2008. godine.

Dana 22.10. i 24.10.2008 godine u FERK su primljeni komentari Elektroprenosa Bosne i Hercegovine a.d. Banja Luka koji su se pored ostalog odnosili na odredbe Mrežnog kodeksa, priključenje korisnika mreže na srednjenaponska postrojenja u TS 110/x kV u vlasništvu Elektroprenosa BiH, planiranje razvoja prenosne mreže i uloge Elektroprenosa BiH a.d. Banja Luka, saradnju sa Elektroprenosom a.d. Banja Luka, te razmjenu podataka sa Elektroprenosom a.d. Banja Luka i Nezavisnim operaterom sistema BiH, kao i nadležnostima za upravljanja SN odvodima i objektima Elektroprenosa.

Nakon provedenih procesa javnih rasprava, a razmatrajući Izvještaj o primljenim i usvojenim komentarima zainteresovanih lica na Nacrt Mrežnih pravila distribucije JP Elektroprivreda BiH d.d. Sarajevo i dostavljenog dopunjenog i izmjenjenog prijedloga Mrežnih pravila distribucije, FERK je utvrdio da dati komentari, kao ni urađene dopune i izmjene, nisu bili takve prirode da zahtijevaju suštinsku reviziju radi kojih bi se obnovio postupaka javnih rasprava. FERK je pažljivo analizirao dostavljeno, vodeći računa da pogon i način vođenja distributivne mreže imaju jasno i precizno definisane granice nadležnosti upravljanja i aktivnosti distributera, operatora distribucije, Elektroprenosa, Nezavisnog operatera sistema te je izmjenio članove, koji nisu bili urađeni u skladu sa Mrežnim kodeksom. FERK je vodio računa i o odredbama Općih uslova za isporuku električne energije, te uslovima izdate Dozvole za rad-licence za obavljanje elektroprivredne djelatnosti distribucija električne energije i nastojanju FERK-a da ostvari Zakonom postavljene ciljeve na način usklađen sa međunarodnim općeprihvaćenim standardima, te je prijedlog Mrežnih pravila distribucije JP Elektroprivreda BiH d.d.- Sarajevo bio predmet razmatranja na XVI redovnoj sjednici FERK-a.

Na osnovu navedenog, odlučeno je kao u dispozitivu ove odluke.

PREDSJEDNICA FERK-a
Dulizara Hadžimustafić